



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM
DOM NARODA
Komisija za administrativna pitanja
Broj: 01,02/7-120/99
Sarajevo, 25.08.1999. god.

Z A P I S N I K
sa 4. zajedničke sjednice Komisije za administrativna pitanja Predstavničkog doma i Doma naroda, održane 24. augusta 1999. godine

Sjednica je počela rad u 12,00 sati.

Sjednici su prisustvovali: Mustafa Pamuk, Pero Skopljak, Nikola Špirić, Ivo Lozančić, Suada Muminagić, Vladimir Šoljić, Izet Žigić, Momir Malić i Avdo Čampara.

Sjednici nisu prisustvovali: Vito Rakić, Desanka Rađević (opravdala izostanak) i Alma Čolo, te Đoko Pajić i Vinko Zorić.

Pored članova Komisije, sjednici prisustvuju Mirko Banjac i Halid Genjac, članovi Kolegija Predstavničkog doma i Drago Ljubičić, član Kolegija Doma naroda.

Sjednicom su predsjedavali Mustafa Pamuk i Izet Žigić.

Za sjednicu je predložen i usvojen sljedeći

D N E V N I R E D

1. Nacrt odluke o organizaciji Sekretarijata Parlamentarne skupštine BiH,
2. Odluka o načinu obračuna plaća i ostalih materijalnih prava zaposlenih u Parlamentarnoj skupštini BiH,
3. Odluka o utvrđivanju funkcija poslanika, odnosno delegata koji ostvaruju prava iz radnog odnosa u domovima Parlamentarne skupštine BiH,
4. Odluka o uslovima i načinu korištenja putničkih automobila za obavljanje službenih oslova u Parlamentarnoj skupštini BiH.

Ad.1.

U raspravi, u kojoj su učestvovali svi prisutni, izneseno je više načelnih primjedbi i konkretnih prijedloga čijom bi se ugradnjom stvorili uslovi za funkcionalniju organizaciju Sekretarijata. Ne dovodeći u pitanje osnovu prijedloga organigrama, članovi komisija i kolegija su iznosili mišljenja da bi, prije svega, trebalo odvojiti stručnu službu od službe zajedničkih poslova.

Na početku rasprave o organizaciji prihvaćene su sugestije da funkcija generalnog sekretara ni njenom organizacionom pozicijom, niti imenom ne bi mogla odgovarati novoj strukturi parlamentarne službe.

Posebno su podcrtane inicijative da kriterij stručnosti bude dominantan pri radnom angažovanju stručnog kadra u Sekretarijatu. Različito je posmatrano pitanje organiziranja kabineta predsjedavajućih i zamjenika predsjedavajućih domova (od broja kabineta, broj šefova, odnosno predstojnika ureda, tehničkih sekretarica i

vozača, uvođenja funkcija savjetnika, do pitanja njihovog radnog statusa s obzirom na izmjenjivost u vršenju funkcije). Različiti stavovi su iznošeni i kada je u pitanju nacionalni kriterij i kriterij izbornih rezultata, pojedinih parlamentarnih političkih stranaka, u odnosu na rukovodna mjesta u Sekretarijatu, kao i pitanje trajanja mandata, odnosno njihove reizbornosti.

Na kraju rasprave je zaključeno da se prijedlozi i sugestije ugrade u prijedlog koji će se razmotriti na nekoj od narednih sjednica.

Ad 2. i 3.

Prihvaćen je prijedlog predsjedavajućeg da se na današnjoj sjednici ne usvajaju predložene odluke, već da se daju primjedbe koje bi mogle koristiti u izradi novog prijedloga odluka.

Istaknuto je da određena rješenja ne zadovoljavaju jer se njima ili podcjenjuje položaj poslanika na profesionalnom radu, ili nekonzistentno tretiraju pitanja vezana za naknade za rad poslanika u komisijama. Iznesena su mišljenja da se moraju odrediti kriteriji za osnovicu, jer se ne zna na osnovu čega se ona utvrđuje, da je nužno približiti dijametralno različite stavove kada je u pitanju i plaća i mjesečni poslanički paušal. U odlukama treba pažljivo ići na rješenja kada je u pitanju profesionalni i neprofesionalni status poslanika i delegata. Data je primjedba da se pitanje njihove profesionalizacije ne može rješavati u pola mandata, nego se o tome mora postići dogovor prije izbora. Istaknuta je potreba da rješenja u odluci pod tačkom 2. trebaju stimulirati rad u komisijama, a da se za ne učestvovanje u radu komisija ne mogu davati naknade.

Ad.4.

O predloženoj odluci nije vođena rasprava, nego je odlučeno da se na nekoj od narednih sjednica razmatra zajedno sa odlukama pod 2. i 3.

Sjednica je završila rad u 16,00 sati.

Predsjedavajući
Komisije za administrativna pitanja
Doma naroda
dr. Izet Žigić

Predsjedavajući
Komisije za administrativna pitanja
Predstavničkog doma
Mustafa Pamuk

